



Herremättli-Clique 1921

Sujet 2018

Schaabe fir dr Maage, Wanze fir e Ranze

S Schwyynige isch versyycht mit Antibiotikaa,
au bi de Hiener isch allerhand froogligs draa.
Z vyyl Schwäärmetall und Blastig hets in de Fisch.
Esoo hesch d Abideeg grad uf em Disch.

Au will d Kieh zvyyl Methaan dien broduziere
und daas zum Klyymawandel duet fiere,
hett unseri Regierig z Bäärn bischlosse,
dass me s Volgg sott Insäggde ässe losse.

Doodermit kenn me d Wälternäurig sicherstelle,
dien uns Wisseschafftler scho lang verzelle.

Drum sotte sich jetzt jeedi und jeede,
e neye Maagefaarplan iiberleege.

Filee, Schüüfeli, Wurscht und Spägg,
alles Flaisch leen mir ewägg.
Au Gummiaadler, Änte und Forälle,
lande nimm uff unsere Däller.

Blattlyys, Boorgekääfer und Aamaise,
sott unseri Naarig in Zuekunft haisse.
Fliege, Schnooge, Ängerling,
Brääme und Motte liige au no drinn.

Mir hän is mieh gää, allerhand iiberlait,
und folgendi Voorschleeg zämmedrait:

Us Maade kennt me Böörger stampfe,
zem mit Kätschap zwische zwai Breetli z mampfe.

Am Moorgestraich gääbs Määlwurmsuppe,
garniert mit Kääs und Gliehwiirmiruppe.

Spätzli, Rootgrut und Hirschkääferpfäffer,
wäär fir jeede Jääger däa Vollträffer.

Statt bim Inder, Tschiggen Tigga Massalaa,
gäbs ney Syyderuppe mit Ghörrisoose draa.

Schwyyنشaxe kääme usser Moode,
me gniessti derfiir Dausigfiesslerbroote.

Statt Schwaarzwaldspägg bim Wandere,
dailti me Schwoobekääfer mit andere.

Greeschteti Ooregriibler und Schnooge,
gääbde em Salaat e ganz e bsunderi Noote.

Worum nit Wäntele und Milbe gratiniert
und mit Filzlyys no garniert.

Im Summer am Rhyboord Haigumper und Grille
zem nach em Baade dr Maage z fille.

S schmeggti woorschyyynlig e weeneli rääs,
Gillerugger basste sicher zue Minschterkääs.

Statt Fisch änd Tschipps am Frytig,
Silberfischli fritiert und yygwigglet in ere Zytig.

Jeesuskääferli mit Zugger kandiert,
würde nach em Hauptgang no serviert.
Und denn no Maiekääfer im Schoggiguss,
wäär e ganz e bsundrige Gnuss.

Und jetzt no dr letschi Schogg,
vo Knorr dr Härdepfelkääferstogg.....

E Guete alli mitenand,
in unserem scheene Schwyzerland.....

*Me bsuecht d'Waage- und Reggwysyte-Uusstellig bi dr Kasäärne
und d' Laddärne-Uusstellig uff em Minschterplatz.
Sy steen deert vom Määntig znacht bis am Mittwoch demoorge.*